

ՀԱՅԿԱԿԱՆ ԶՈՐՔԸ ԱՐՏԱՇԵՍՅԱՆՆԵՐԻ ԺԱՄԱՆԱԿ

Ս. Մ. ԿՐԿՑԱՇԱՐՏԱՆ

Հայկական զորքի և նրա ինքնուրույն ռազմական գործողությունների մասին համեմատաբար ավելի հավաստի տվյալներ ունենք Տիգրան Բ-ի թագավորության ժամանակաշրջանի վերաբերյալ, որոնք մեզ հասել են անտիկ հեղինակների և Մովսես Խորենացու միջոցով:

Ժիշտ է, պատմահայրը հայկական պետական հաստատությունների ու հայկական բանակի կազմակերպումը վերագրում է հայոց կիսապատմական թագավոր Նաղարշակ Արշակունուն¹, այնուամենայնիվ կասկածից վեր է, որ Տիգրան Բ-ը մեծ վերափոխություններ ձեռնարկեց հայկական բանակի վերակազմության ուղղությամբ, այն բարձրացնելու համար իր ժամանակի առումով պրոֆեսիոնալ աստիճանի: Հաջորդած դեպքերի ամբողջ ընթացքը ցույց է տալիս, որ այդ բանը նրան մասամբ հաջողվում է: Տիգրան Բ-ի կատարած ռազմական վերափոխությունների ամենամեծավոր հետևանքը պիտի համարել կարճ ժամանակում նրա տերության աահամանների ոչ միայն վերականգնումը, այլև դրանց աննախընթաց ընդարձակումը Կովկասյան լեռներից մինչև Կիլիկիա ու Պաղեստին: Տիգրան Մեծի ռազմական այդ վերափոխությունների էությունը մասին որոշ պատկերացում կարելի է կազմել Մովսես Խորենացու այն վկայությունից, թե այդ ժամանակ «հետևակամարտքն ի վերայ ուսոց ձիոց բերելք, և պարսատրքն առ հասարակ դիպաղեզունք, և շերտաւորքն ի սուսեր և ի տէգ նիզակի վառելք. մերկքն վահանօք և զդեստուք երկաթօք պարածածկելք: Որոց ի մի վայր հասելոց բաւական էր տեսիլն միայն, և որ ի նոցայն պահպանակաց և զինուց փայլմունք և շողիւնք՝ յթշնամիսն արտասուլածել»²:

Տիգրան Բ-ի բանակի և նրա մղած ռազմական գործողությունների մասին անտիկ հեղինակների մեզ հասած տեղեկությունների ուսումնասիրությունից պարզվում է, որ Արեւելի մյուս երկրների նման, Հայաստանում ևս գլխավոր հրամանատարը ինքը՝ թագավորն էր: Սակայն, ոչ բոլոր արշավանքների ժամանակ էր հայոց թագավորն առաջնորդում իր զորքին:

Հետևենք սկզբնաղբյուրների վկայություններին: Ասիանոսը հաղորդում է, որ Տիգրանի զորավարներից Միթրասը և Բագոասը ուղարկվեցին Կապադովկիան նվաճելու³, Մեկ այլ աղբյուր նույն Ասիանոսը խոսում է Տիգրանի Բադադատես (Μαδαδατα = Βαγδατα) զորավարի մասին⁴: Հավանաբար այս Բագադատեսն է Տիգրանի կողմից, զորքի մի մասով, ուղարկվել նվաճելու Կոմագենեի թագավորությունը և Դաշտային Կիլիկիան, մինչ ինքը՝ հա-

¹ Մովսեսի Խորենացու Պատմութիւն Հայոց, Տիգրան, 1913, Բ, գլ:

² Նույն տեղում, Ա, իդ:

³ Appian, Mithridatica, 19.

⁴ Նույն տեղում, 48:

յոց թաղավորը, իբրև զորավար էր Փյունիկիայի վրա արշավելով: Այնուհետև, այս Բաղադատեն էր, որ 69 թ., Լուկուլլոսի արշավանքի ժամանակ, իր զորքով Կիլիկիայից օգնության շտապեց անակնկալ հարձակման ենթարկված Տիգրանին:

Տիգրան Բ-ի մեկ այլ զորապետի՝ Մեհրուսանի (Μεῦροῦσανης) մասին, որը Մեծ Հայքին միացված Մոփքի թագավորական զերդաստանից էր, հանդամանալից խոսում են Պլուտարքոսն ու Ապիանոսը: Անակնկալի եկած հալոց թաղավորը սրան 2000 հեծելազորով ուղարկում է Լուկուլլոսի դեմ՝ հռոմեական լեգեոնների առաջխաղացումը կանգնեցնելու համար: Տեղի ունեցած կատաղի ճակատամարտում Մեհրուսանն ընկնում է քաջաբար: Մեհրուսանի հրամանատարությունը հանձնված այս հեծելազորի, ինչպես նաև Հույաստանի նախկին սյուզերեն Սելևկյան թագավորի արքունի հեծելազորի մասին սկզբնաղբյուրներում պահպանված տեղեկությունների ուսումնասիրությունը հնարավորություն է տալիս որոշ չափով պարզելու Մեհրուսանի պաշտոնի և նրա ղեկավարած հեծելազորի էությունը:

Սելևկյանների իշխանության կարևորագույն հենարանը նրանց, ճիշտ է, խալսաբազեթ, բայց պատերազմի ժամանակ պատկառելի ուժ ներկայացնող բանակն էր: Այդ բանակի կազմի մասին որոշ պատկերացում են տալիս 216 թ. Իսաֆիայում և 190 թ. Մազնեսիայում տեղի ունեցած պատերազմների նկարագրությունները, որ թողել են Պոլիբիոսը, Ապիանոսը և Տիտոս Լիվիոսը⁵:

Այդ նկարագրությունների հիման վրա ուսումնասիրողները եզրակացրել են, որ Սելևկյանների հսկայական բանակը հիմնականում կազմված է եղել հետևակներից և հեծյալներից: Հետևակների ամենակարևոր մասը հայտնի մակեդոնական ֆալանգան էր, որտեղ զլխավոր հարվածային ուժը կազմում էր պեդետուրոյ (πεδευτοί = հետևակ ընկերներ) կոչված գունդը: Այս բանակը, որ զոյություն ուներ դեռևս Փիլիպոս Բ-ի և Ալեքսանդր Մակեդոնացու ժամանակ և բաղկացած էր 6000 ծանրազեն հետևակներից, հանդիսանում էր թագավորի թիկնապահ զորքը:

Հետևակի շարքերում, բացի ծանրազեն հոպլիտներից, կային նաև թեթևավազն աղեղնավորներ և պարսատիկավորներ (τοξόται καὶ σφενδονοχται)⁶:

Եթե Ալեքսանդր Մակեդոնացու արշավանքներին մասնակցած հետևակը հիմնականում կազմված էր մակեդոնացի ծանրազեն ֆալանգիտներից, ապա Սելևկյանների ժամանակ մակեդոնական ֆալանգայի կողքին կարևոր տեղ էին զբաղում նաև հույն և բարբարոս (ոչ հույն) վարձկանների, ինչպես և Սելևկյաններին հպատակ երկրներից հավաքագրվածների զնդերը:

Սելևկյանների հեծելազորը ևս, հետևակի նման, բաղկացած էր բուն մակեդոնացիներից, որը կոչվում էր ագեմա (το ἄγόμενον ἄγμα των Μακεδόνων)⁷ և տեղաբնիկ, արևելյան ժողովուրդներից, քանի որ Ապիանոսի համապատասխան վկայության մեջ, մակեդոնացիների կողքին, հիշատակ-

⁵ Plutarchi, Lucullus, XXV, 3—6, Appiani, Mithrid., 84.

⁶ Polybii Historiae, V, 79, Appiani Syriaca, 32, Titus Livius, XXXVII, 40.

⁷ E. Bickerman, Institutions des Séleucides, Paris, 1933, էջ 32—60.

⁸ Polyb., V, 53,9, նաև՝ 79,6 և XVI, 18,7.

⁹ Appiani, Syriaca, XXXII, Տիտոս Լիվիոսը սխալմամբ այդ ագեման համարում է Մեդական (Titus Livius, 40,6.

ված են հեծյալ աղեղնավորների դայերից, միսիացիներից և էլիմայեցիներից (ἱπποτοξόται Δααί καὶ Μισοὶ καὶ Ἐλιμαῖοι), ինչպես նաև՝ ժանրագեն հեծյալ զալաաներ (Γαλαταὶ καὶ Ἀρμενῶται)¹⁰, Պոլիբիոսը ևս, Սելևկյանների պարթը նկարագրելիս, հիշատակում է նիսայական ժանրաղեն հեծելազորի մասին¹¹, Ապիանոսը նույն տեղում հիշատակում է նաև ὁπλοῦντες (դրոմադեն-վազողներ) կոչված զույգը, որը, ամենայն հավանականությամբ, կազմում էին անապատի արարներն իրենց ուղտերով:

Բացի հեծելազորի մի գնդից, որի մասին կիսովի ստորև, ինչպես նաև տարբեր բերդերում տեղակայված կայազորներից, Սելևկյանների այս ամբողջ բանակը, ըստ երևույթին, մշտական չէր, այլ հավաքագրվում էր պատերազմների ժամանակ: Հայոց թագավորը ևս, Սելևկյանների նման, չի ունեցել մշտական բանակ: Ս. Տ. Երեմյանը այդ առթիվ իրավացիորեն նշում է, որ «հելլենիստական մյուս միապետությունների նման, Հայաստանում ևս չկային մշտական խոշոր բանակներ: Պատերազմի ավարտից հետո հայ թագավորները արձակում էին դրանք: Սակայն այս պրակտիկան կապված էր խոշոր անպատեհությունների հետ, քանի որ նոր պատերազմի զեպքում հարկ էր լինում կրկին հավաքագրել: Այդ պատճառով թագավորը իր մոտ պահում էր հեծելազորի մի մասը»¹²:

Սելևկյանների մշտական բանակը հիմնականում ցրված էր տերության տարբեր պրովինցիաներում որպես կայազորներ և տեղավորված էր բերդերում (φρούρα): Այդպիսի բերդեր հայտնի են Սարդեսում, Եփեսոսում, Սուսայում, Երուսաղեմում, Գուրա-Եվրոպոսում և այլուր: Բերդի կայազորը գտնվում էր բերդապահի (φρουροῦ) հրամանատարության ներքո¹³, Բերդապահն աղբյուրներում հաճախ կոչվում է նաև ἀρχοῦντος¹⁴ կամ πραιfectus¹⁵:

Հելլենիստական թագավորների կայազորները հաճախ տեղակայված էին լինում ոչ միայն բերդերում և ամրոցներում, այլև թագավորին ենթակա քաղաքներում: Քաղաքներին ուղղված հելլենիստական թագավորների նամակներում հանդիպող ἐπιστάτης (տեղավորված լինել օթևաններում) և ἀνεπιστάτης¹⁶ (օթևան տրամադրելու պարտավորություններից ազատ) քառերը, ինչպես նաև Պոլիբիոսի ուշագրավ մի վկայությունը¹⁷ դրա ամենահավաստի ապացույցն են: Հունական քաղաքներում կայազորներ (φύλαξι) տեղավորելու պրակտիկան գոյություն է ունեցել դեռևս Ալեքսանդր Մակե-

¹⁰ Appiani, Syriaca, XXXII.

¹¹ Polyb., XXXI, 3, 6.

¹² Ս. Տ. Երեմյան, Основные черты общественного строя Армении в эллинистический период (ՀՍՍՀ ԳԱ «Տեղեկագիր» (հաս. գիտ.), 1948, № 11, էջ 56)։

¹³ Polyb., 44, 1; Jos. Flavil. Jud. Antiq., XIII 398.

¹⁴ Polyb., V, 50, 10.

¹⁵ «Աստուածաշունչ», Բ Մակկարեաց, Դ, ԻԷ.

¹⁶ C. B. Welles. Royal correspondence in the hellenistic period, New Haven, 1934, 30, 7.

¹⁷ Նույն տեղում, 70, 13.

¹⁸ Պոլիբիոսի պատմելով, Թասոսի բնակիչները հազորդում են Մակեդոնիայի թագավոր Փիլիպոս Ե-ին, որ քաղաքը կհանձնեն, եթե իրենց ազատի «կայազորից, հարկերից, օթևան տրամադրելու պարտավորությունից և թույլատրի ապրել սեփական օրենքներով» (Polyb., XV, 24, 2)։

դրնացու ժամանակ և ամեն մի քաղաքային համայնք պարտավոր էր իր միջոցներով հոգալ կայազորի կարիքները¹⁹։ Դրանով մի կողմից թագավորի տրամադրության տակ լինում էր որոշ քանակությամբ մշտական զորք, մյուս կողմից՝ սահմանափակվում էր քաղաքի ինքնավարությունը և ուժեղանում նրա ենթակայությունը թագավորական իշխանությանը։

Անկասկած, Սելեկյանների մշտական բանակի մասն էին կազմում նաև աղբյուրներում հիշատակված թիկնապահները՝ (ἡπαιεῖς)՝ իրենց հրամանատարով (ἡγεμόν τῶν ἡπαιεῖς)²⁰։

Սելեկյանների այս խայտաբղետ բանակում, սակայն, սամնակարևոր դերը պետք է խաղար հեծելազորային այն գունդը, որը հայտնի է ադեմա (ἀδεμα)²¹ կամ արբունի հեծելազուն դ (ἄρβυνοι ἵππ.)²² անունով։

Տիգրան Բ-ի բանակի մասին խոսելիս, մենք անհրաժեշտ համարեցինք համառոտակի ուրվագծել Սելեկյանների բանակի կազմակերպական պատկերը, քանի որ, մեր կարծիքով, հելլենիստական այդ խոշորագույն պետության բանակը (ինչպես նաև հարևան հելլենիստական ավելի փոքր միապետությունների բանակները) այն հիմնական սկզբնօրինակն էր, որին հետևեց հայոց լիազավորն իր գործը կազմակերպելիս։ Հետևաբար, Տիգրանի բանակը ևս հռոմեականի նկատմամբ պետք է ունենար նույն թերությունները, ինչ Սելեկյաններին, որի հետևանքով էլ, Անտիոքոս Գ-ի նման, Տիգրանը ևս պարտվեց հռոմայեցիների դեմ բաց դաշտում մղած առաջին ճակատամարտում։

Հայաստանում նույնպես բանակի գլխավոր հարվածային կորիզը թագավորի թիկնապահ հեծելազորն էր։ Հայոց թագավորներ Տիգրանի, Արտավազդի և Արշակունի Տրդատ Ա-ի թիկնապահ հեծելազորի մասին մեղ հասել են անտիկ հեղինակների մի շարք հետաքրքիր հիշատակություններ, որոնք մեջ ենք բերում բնագրից՝ թարգմանաբար.

«Առաջինը նրա (Տիգրանի—Ս. Կ.) ընկերներից (τῶν φίλων) Մեհրուսանը համարձակվեց ճշմարտությունը հաղորդել... Սա իսկույն ուղարկվեց Լուկուլիոսի դեմ 3000 հեծելազորով և բազմաթիվ հետևակով»²³։

«Տիգրանը... Մեհրուսանին ուղարկեց 2000 հեծյալներով, որպեսզի խափանի Լուկուլիոսի ճանապարհը»²⁴։

«Իսկ Տիգրան թագավորը... վերցնելով իր ընկերներին ու ազգականներին, զենաց, որպեսզի անձնատուր լինի Պոմպեոսին»²⁵։

«Նրան (Կրասոսին—Ս. Կ.) սրտապնդեց հատկապես Արտավազդ Արմենի ժամանումը։ Սա եկավ ճամբար 6000 հեծելազորով։ Իսկ սրանք, ինչպես ասում էին, միմիայն թագավորի թիկնապահներն էին և ուղեկիցները։ Նա (Արտավազդը—Ս. Կ.) խոստանում էր, որ կտա տասը հազար այլ զրահապատ հեծելազոր և երեք հազար հետևակ...»²⁶։

¹⁹ W. Dittenberger, Sylloge Inscriptionum Graecarum, ed. 3, Lipsiae, 1915—1924. 3, 283.

²⁰ Polyb., VII, 16. 2, Polyaeus, Strategemata, IV, 9, 3.

²¹ Polyb., XXXI, 3, 7, Appian, Syriaca. XXXII,

²² Polyb., V, 85. 12, Polyaeus, Strategemata, IV, 9, 6.

²³ Plut., Lucull., XXV, 8.

²⁴ Appian, Mithrid., 84.

²⁵ Plutarchi Pompeius, XXXIII, 1.

²⁶ Plutarchi Crassus, XIX, 1—2.

Մի վկայություն էլ կա Տրդատ Ա-ի թիկնապահ հեծելազորի մասին: Հռոմեացի մոտ հայ-պարթևական միացյալ զորքերից կրած ծանր պարտությունից հետո Հռոմը հարկադրված եղավ համաձայնվել, որ Տրդատ Արշակունին մեկնի Հռոմ և այնտեղ ներսն էր կայսեր ձեռքից ստանա Հայաստանի թագը: Տրդատի Հռոմ կատարած ճանապարհորդությունը և այնտեղ նրան ցույց տրված շքեղ ընդունելությունը մանրամասն նկարագրել է Դիոն Կասիոսը: Տակիտոսը և Պլինիոս Ավագը ևս որոշ մանրամասներ են հաղորդում Տրդատի այցելության մասին: Նրանց վկայությամբ, Տրդատն ուղևորվելիս իր հետ վերցրել էր կնոջը և երեխաներին, իր եղբայրներ՝ Ատրպատականի թագավոր Բակուրի և Ադիաբենեի թագավոր Մոնոբադոսի որդիներին: Հայոց թագավորին ուղեկցում էր 3000 հայ ու պարթև հեծյալներից բաղկացած մի շքախումբ²⁷:

Վերոհիշյալ վկայություններում հիշատակված հայոց թագավորի թիկնապահ հեծելազունը, անկասկած, համապատասխանում էր Սելևկյանների մակեդոնական աղեմային, որի մասին արդեն ասվեց: Հայկական այդ հեծելազունը, իր սոցիալական կազմով, նման պետք է լիներ աղեմային: Ինչպես հայտնի է, մակեդոնական աղեման բաղկացած էր Սելևկյան թագավորի ընկերներից և մերձավոր բարեկամների (ἐταίροι, φίλοι, συνήγοροι), որոնցից էլ, սովորաբար, նշանակվում էին պալատական և այլ պաշտոնյաները: Պուտարքոսի, Ապիանոսի, ինչպես և մյուս հեղինակների վկայություններից հետևում է, որ հայկական թիկնապահ հեծելազունը ևս կազմված էր թագավորի բարեկամներից և բնակներից: Ելնելով դրանից, պետի Լեթալերը, որ հայոց թագավորի թիկնապահ գնդի և նրա հրամանատարի դերը երկրի քաղաքական կյանքում նույնքան կարևոր էր, ինչքան Սելևկյան պետությունում:

Այդ փաստը արձանագրված է հետագա դարերի հայ մատենագրության մեջ: Մովսես Խորենացին, օրինակ, պատմելով Վաղարշակ թագավորի կողմից Հայաստանում արքունի գործակալությունների՝ նախարարությունների հաստատման մասին, վկայում է, որ թագավորը նշանակում էր ռթիկնապահս իւր, ղինու հանդերձ, ի զաւակացն իւրաւ Հայկազնոյ, արս ընտիրս և քաջս, նիզակաւորս և սուսերաւորս, և գլուխ նահապետութեան նոցա զՄաղխազ ոմն այր բարի և սրտեայ»²⁸: Ինչպես հետևում է պատմահոր այս վկայությունից, մաղխազը գլխավորում էր արքունի թիկնապահների գունդը և նրա վարած պաշտոնը կոչվում էր «մաղխազություն», որը հին Հայաստանում կարևորագույն վեց գործակալություններից (թագակապ ասպետություն, հազարապետություն, մարդպետություն, մաղխազություն, սպարապետություն և մեծ դատավորություն) մեկն էր: Ըստ Ն. Ադոնցի, «մաղխազ» նշանակում է տեր, իշխան, թագավոր²⁹:

Սենք արդեն նշել ենք, որ Տիգրանի թիկնապահ հեծելազնդի հրամանատար Մեհրուտանը Մովսեսի թագավորական տոհմից էր: Այդ հանգամանքը, ինչպես նաև «մաղխազ» անվան Ն. Ադոնցի տված բացատրությունը միանշանակ պարզ են դարձնում, որ բարձր ազնվականությունից սերած այդ պաշ-

²⁷ Cassius Dio, LXIII, 1—7; Taciti, Annales, XVI, 24, C. Plinii Naturalis Historiae, XXX, 16, XXXIII, 54.

²⁸ Մովսես Խորենացի, Բ, է.

²⁹ Н. Адонц, Армения в эпоху Юстиниана, СПб., 1908, стр. 400.

տոնյան շատ մոտ կանգնած լինելով արքունիքին, նշանակալից դեր պետք է խաղար Հայաստանի քաղաքական կյանքում:

Սելևկյանների մականդոնական ազնվայի և հայոց թագավորի թիկնապահ հեծելազորի ոչ միայն սոցիալական դերն ու դիրքն էր համընկնում համապատասխան երկրների հասարակական-քաղաքական կյանքում, այլև իրանք համարյա համընկնում են նաև քանակապես:

Ինչպես տեսանք, Պոլիբիոսի և Ապիանոսի վկայություններում Սելևկյանների աղևման բաղկացած էր 2000 հեծյալներից: Վերևում բերված տրվյալների համաձայն, հայոց թագավորի թիկնապահ հեծելազորն էր հաշվվում ևր 2000, 3000, 6000 և 3000, Առաջին հայացքից թվում է, թե այդ գնդի թիվը Հայաստանում տարբեր ժամանակներում տատանվել է 2000—6000-ի միջև: Սակայն այդ տվյալների մանրակրկիտ վերլուծությունը թույլ է տալիս ասելու, որ հայկական թիկնապահ գունդը ևս, Սելևկյան ազնվայի նման, բաղկացած է եղել շուրջ 2000 հեծյալներից: Ինչպես նկատեցինք, Ապիանոսը հաղորդում է, որ Տիգրանը Մեհրուսանին 2000-անոց հեծելազորով ուղարկեց Լուկուլլոսի դեմ: Նրա հաղորդած այս թիվը պետք է համարել միակ ճիշտը:

Պլուտարքոսը, նկարագրելով նույն դեպքերը, նշում է, որ Տիգրանը Մեհրուսանին Լուկուլլոսի դեմ ուղարկեց 3000 հեծյալներով և բազմաթիվ հետևակով: Տիգրան Բ-ի պատմությանը վերաբերող Պլուտարքոսի մի շարք վկայություններ չեն համարում հիմնականում է միտոմանավոր ու չափազանցված: Մենք հակված ենք ենթադրելու, որ Մեհրուսանին հանձնված հեծելազորի թիվը և հետևակի մասին Պլուտարքոսի այս հաղորդումը ևս վստահելի չէ: Դեռ չենք մանադրյալներ ժամանակին մատնացույց է արել, որ Պլուտարքոսը իր իդեալականացրած հերոսի՝ Լուկուլլոսի հաղթանակն ընգծելու նպատակով, ուժացրել է Տիգրանի զորքերի թիվը³⁰, Անհավանական պիտի համարել նաև Պլուտարքոսի հաղորդման այն մասը, որ իբր հեծելազորից բացի, Մեհրուսանին հանձնվել էր նաև հետևակ զորք, այն էլ «բազմաթիվ»: Ինչպես ճիշտ նշում է Չ. Մանանդյանը³¹, Լուկուլլոսի արշավանքը հանկարծակի էր բերել Տիգրանին, Հետևաբար, հայոց թագավորը պատրաստ չէր պատերազմի և չէր կարող այդ ժամանակ Տիգրանակերտում իր տրամադրության տակ ունենալ «բազմաթիվ հետևակ»:

Ինչ վերաբերում է մ. թ. ա. 54 թ. Կրասոսի բանակատեղին Արտավազդի գալու մասին Պլուտարքոսի հաղորդմանը, որի համաձայն հայոց թագավորը ժամանել էր 6000 թիկնապահներով, ապա, կարծում ենք, որ այն ոչ լիովին է համապատասխանում պատմական իրականությանը: Կասկած չի կարող լինել, որ մինչև Ասորիք, որտեղ բանակ էր դրել պարթևների դեմ արշավանքի պատրաստվող Կրասոսը, ճանապարհով հայոց թագավորին պետք է որ ուղեկցեին 2000 հեծյալներից բաղկացած նրա թիկնապահ հեծելազորը, Արտավազդը, անտարուկույս, խրատված իր հոր՝ Տիգրան Բ-ի ճակատագրական սխալից, որը չէր կանխատեսել նենգ Լուկուլլոսի անակնկալ արշավանքը, ռազմական անհրաժեշտ պատրաստություն էր տեսել, հավաքելով բավականաչափ զորք, հսրկ եղած դեպքում դիմագրավելու և՛ հռոմայեցիների, և՛

³⁰ Չ. Չ. Մանանդյան, Տիգրան Երկրորդը և Հռոմը, Երևան, 1940, էջ 116—120:

³¹ Նույն տեղում, էջ 93—103, Ս. Մ. Կրկյաշարյան, Տիգրան Բ-ին վերաբերող մի կարևոր ուղղում (Քաղաքականության պատմություն, 1967, № 4, էջ 275—278):

պարթևների հավանական հարձակումները, Հետևաբար, և՛ անձնական ապահովության (ներառյալ հրաձգարհի զգալի մասն անցնում էր օտար երկրի տարածքով), և՛ իր ուժը ցուցադրելու համար, նա, բացի իր թիկնապահ հեծելազորից, որի թիվը պետք է լիներ շուրջ 2000, իր հետ վերցրել էր նաև մի քանի հազար այլ հեծյալների, որով նրան ուղեկցող զորքի ընդհանուր թիվը հասել էր 6000-ի, իսկ հռոմայեցիներն այդ պատկանելի բանակն ամբողջությամբ ընդունել էին որպես թագավորի թիկնապահ զորք։

Այժմ մի քանի խոսքով անդրադառնանք Նևրոնի ձեռքից Հայաստանի թագն ստանալու համար Հռոմ ուղևորված Տրդատ Արշակունուն ուղեկցող երեք հազարանոց հեծյալ շքախմբին։ Ակներև է, որ այն եղել է խայտառղետ Սակայն այդ շքախմբի հիմնական կորիզը, անկասկած, թագավորի 2000-անոց թիկնապահ հեծելազորն էր։ Շքախմբի թիվը հասել էր 3000-ի հավանաբար այն բանից հետո, երբ թագավորական հեծելազորին միացել էին Ատրպատականի և Ադիաբենի թագաժառանգներին ուղեկցողները, ինչպես նաև՝ պարթև Վաղարշ Ա-ի Հռոմ ուղարկած պատգամավորները։

Խորհնացու այն եզակի հաղորդումը, թե Արտաշեսը հայկական զորքերը չորս մասի բաժանեց և դրանք, համասլատասխանաբար, հաստատեց աշխարհագրական չորս ուղղություններով³², հնարավորություն է տալիս ենթադրելու, որ Արտաշեսյանների ժամանակ Հայաստանում ստեղծված են եղել հատուկ սահմանապահ զորամասեր, որոնց պարտականությունն էր՝ երկրի սահմանները պաշտպանել արտաքին հարձակումներից։ Մեր կարծիքով, այս հիմքի վրա է, որ հետագայում, Արշակունիների օրով, Հայաստանում ստեղծվում են «կողմնակալ» իշխանություններ, որոնք գալիս են փոխարինելու նախկին բզեխություններին։

Պատերազմի ժամանակ հայոց թագավորը հավաքում էր մեծ քանակությամբ հետևակ զորք, որի թիվը, ըստ մոտավոր հաշվումների, կարող էր հասնել 100 հազարի։ Մեր խոսքը, անշուշտ, վերաբերում է ոչ թե Տիգրան Բ-ի նվաճումներից հետո առաջացած ընդարձակածավալ և էթնիկապես խայտառղետ տերությունից, այլ, ընդհանրապես, Մեծ Հայքից հավաքագրվող զորքերի քանակին³³։

Արտաշեսյանների ժամանակ հայոց թագավորը հեծյալ թիկնապահ զորքից և մեծաթիվ հետևակից բացի, ուներ նաև պատկանելի թվով հեծյալ զորաբանակ։ Թեև սկզբնաղբյուրներում հայկական հեծելազորի ամբողջ թվի մասին հիշատակություն չկա, սակայն այլ տվյալներով հնարավոր է որոշել դրա մոտավոր քանակը։ Այսպես՝ Պլուտարքոսը հաղորդում է, թե Արտավազդը, գալով Կրասոսի մոտ, խոստացավ նրան տրամադրել «10 հազար զրահավառ հեծելազոր և 30 հազար հետևազոր»³⁴։ Ենթադրելով, որ Արտավազդը, իբրև «Հռոմի դաշնակից ու բարեկամ», Կրասոսին օգնելու համար կտրամադրեր ոչ թե իր ամբողջ զորքը, այլ, լավագույն դեպքում, դրա կեսը, կարելի է ասել, որ նրա զրահավառ հեծելազորի թիվը (բացի թիկնապահներից) հասնում էր 20 հազարի։

³² Մ ո վ ս ե ս Խ ո Ր Ե Ն ա Յ Ի, Բ, Իգ։

³³ «Հայ ժողովրդի պատմություն», հ. 1, Նրևա, 1971, էջ 686—688։

³⁴ Plut., Crassus, 19. 1—4.

Բացի հիմնական հեծյալ և հետևակ զորքերից, հայկական բանակում կային նաև օժանդակ զորամասեր, որոնց մասին վկայություններ են մնացել Ստրաբոնի, Պլուտարքոսի և այլոց մոտ: Այսպես՝ Ստրաբոնը, խոսելով Տիգրանին հպատակ կորզվացիների մասին, նշում է, որ «ներանք համարվում էին աչքի ընկնող ճարտարապետներ և պաշարողական գործերի մեջ փորձառու: Իրա համար էլ Տիգրանը նրանց օգտագործում էր այդպիսի գործերում»³⁵: Պլուտարքոսը, նկարագրելով Տիգրանակերտի ճակատամարտը, խոսում է Տիգրանի բանակում հղած սակրավորների զորամասերի, ինչպես նաև մեծաքանակ դումակի մասին³⁶, որը և այդ ճակատամարտում դառնում է Տիգրանի պարտության հիմնական պատճառը:

Ինչպես նկատեցինք, աղբյուրներում տարբեր առիթներով հիշատակվում են Տիգրան Բ-ի զորքի հրամանատարների անունները: Դա վկայում է, որ ո՛չ Արտաշեսի, ո՛չ իսկ Տիգրանի ժամանակ դեռևս գոյություն չունեին հայոց սպարապետի ժառանգական պաշտոնը և սպարապետությունը չէր կազմավորվել որպես նախարարություն: Այն կազմավորվեց հետագայում, Արշակունիների թագավորության ժամանակ, երբ Հայաստանում պետական բոլոր պաշտոնները, որպես արքունի գործակալություններ, ժառանգաբար շնորհվեցին այս կամ այն նախարարական ընտանիքի ավագ ներկայացուցչին:

Ասացինք, որ Տիգրան Բ-ի (ինչպես և նրա հաջորդների) ժամանակ արդեն կազմակերպվել էր արքունի թիկնապահ հեծելազորը և այդ գնդի հրամանատարն էր Մեհրուսանը: Այս կարևոր պաշտոնը ևս այդ ժամանակ չէր կարող ժառանգական լինել, քանի որ հիշյալ Մեհրուսանը Մոփքի թագավորական գերդաստանից էր³⁷, որը տակավին նոր էր միացվել Տիգրանի թագավորությանը և, հավանաբար, Մոփքի արքունիքի ներկայացուցիչներին սիրաշահելու համար հայոց թագավորը արքունի գերդաստանին զանազան պաշտոններ էր տալիս:

Վերևում ասվեց, որ Սելևկյանների մշտական բանակը հիմնականում ցրված էր տերության տարբեր մասերում որպես կայազորներ, տեղակայված բերդերում: Հավանաբար, Հայաստանում ևս հայոց թագավորի զորախմբերը ցրված են եղել երկրի բերդերում և ամրոցներում: Դրանցից նշանավորը Տոմիսա բերդն էր՝ Եփրատի ձախ ափին, Կապադովկիայի և Մոփքի սահմանի վրա: Ստրաբոնը այն տեղադրում է Մոփաց աշխարհում³⁸, Տոմիսան ոչ միայն հայտնի ամրություն էր, այլև գտնվելով պարսկական հին «արքունի ճանապարհի» վրա, միաժամանակ Հայաստանի վրայով Բաբելոնիա կամ Փոքր Ասիա գնացող կարավանների հայտնի կայան էր³⁹: Հաշվի առնելով այս վերջին հանգամանքը, պիտի ենթադրել, որ այդ ամրոցում տեղակայված բերդապահ զորքը պարտավոր էր ապահովել Տոմիսայի վրայով անցնող կարավանային ուղիների անվտանգությունը:

³⁵ Strabo, XVI, I, 24.

³⁶ Plut., Lucull, 26—27.

³⁷ J. Markwart, Eranschahr nach der Geographie des Ps. Moses Xorenac'i Berlin, 1901, էջ 176, շ. 2. Մասնագյան, նշվ. աշխ., էջ 103.

³⁸ Strabo, XII, 2, 1 և XIV, 2, 29.

³⁹ Շ. 2. Մասնագյան, Քննական տեսություն հայ ժողովրդի պատմության, հ. 1, 1944, էջ 111:

Արտաշատ մայրաքաղաքի մասին խոսելուց հետո, Ստրաբոնը թվարկում է Հայաստանի մի շարք բերդերի անուններ, որոնք միաժամանակ եղել են հայոց թագավորի գանձատները: «Քաղաքից (Արտաշատից—Ս. Կ.) ոչ շատ հեռու,— գրում է Ստրաբոնը,— գտնվում էին Տիգրանի և Արտավազդի գանձատները, Բաբլուրս և Օլանե անառիկ ամրոցները: Ուրիշներ ևս կային եփրատի վրա: Արտագնյրան ապստամբեց բերդապետ Ագոնի գլխավորությամբ: Կեսարի զորավարները գրավեցին այն, երկար ժամանակ պաշարելուց հետո և պարիսպները քանդեցին»⁴⁰: Այս վերջին դեպքի մասին Դիոն Կասսիոսի մոտ եղած հիշատակության համաձայն, Արտագնյրա ամրոցը ևս եղել է հայոց թագավորի գանձատներից մեկը⁴¹:

Բերդերն ու ամրոցները որպես ապահով գանձատներ օգտագործել են ոչ միայն հայոց թագավորները, այլև հարևան հելլենիստական միապետները: Ստրաբոնը գրում է, որ «Միհրդատ նվաճողը... հոգ տարավ այս երկրների մասին և կառուցեց այնտեղ 75 ամրոց, պահելու համար իր գանձերի մեծագույն մասը: Սրանցից առավել հիշարժան են Հյուդարան, Բասդոյդարիզան և Սինոքիան»⁴²:

Կասկած չի կարող լինել, որ Հայաստանի ամենահայտնի բերդերից է եղել Արտաշատ մայրաքաղաքը հյուսիսից պաշտպանող Գառնի ամրոցը, որը ամբողջ I դարում խոշոր դեր է խաղացել երկրի քաղաքական ու ռազմական կյանքում: Ուստի, բոլորովին էլ պատահական չպետք է համարել այն հանգամանքը, որ Գառնիի մասին հիշատակություններ կան ոչ միայն օտար և հայ մատենագիրների մոտ, այլև այնտեղ հայտնաբերված հունարեն արձանագրության մեջ: Բերդապահ զորքերի պետը, որին վստահված է եղել երկրի այս կամ այն ռազմական կարևոր հանգույցի, ինչպես նաև արքունի գանձերի պաշտպանությունը, պատկանում էր թագավորին շրջապատող ամենահեղինակավոր և անդեմեկ պաշտոնյաների թվին:

АРМЯНСКОЕ ВОЙСКО ПРИ АРТАШЕСИДАХ

С. М. КРКЯШАРЯН

Резюме

Об армянском войске и его самостоятельных военных действиях имеются достоверные сведения, начиная с царствования Тиграна II. Мовсес Хоренаци приписывает организацию армянских войск полугендарному царю Вагаршаку (II в.). Однако Тигран II, несомненно, провел большие реформы по реорганизации армянского войска. Главнокомандующим войска являлся сам царь, но проведение той или иной военной кампании он всегда поручал своим полководцам. Основное ядро войска Арташесидов составлял конный отряд телохранителей царя (3000 всадников). В состав отряда входили друзья и приближенные царя.

⁴⁰ Strabo, XI, 14, 6.

⁴¹ Cass. Dio, LV, 10.

⁴² Strabo, XII, 3, 28.